



PARLIMEN MALAYSIA



RANG UNDANG-UNDANG

Bank (Pindaan) 1985

DR.32/1985

RANG UNDANG-UNDANG

bernama

Suatu Akta untuk meminda Akta Bank 1973.

MAKA INILAH DIPERBUAT UNDANG-UNDANG oleh Duli Yang Maha Mulia Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti berikut :

1. Akta ini bolehlah dinamakan Akta Bank (Pindaan) 1985.

Tajuk ringkas.

2. Akta Bank 1973, yang disebut "Akta ibu" dalam Akta ini, adalah dipinda dengan memasukkan selepas sahaja tafsiran "perniagaan bank" tafsiran "syarikat kewangan berlesen" yang berikut :

Pindaan seksyen 2, Akta 102.

"syarikat kewangan berlesen" ertinya sesuatu syarikat kewangan berlesen di bawah Akta Syarikat Kewangan 1969;".

3. Akta ibu adalah dipinda dengan memasukkan selepas sahaja seksyen 23, seksyen baru 23A, 23B, 23C, 23D, 23E, 23F dan 23G yang berikut :

Seksyen baru 23A, 23B, 23C, 23D, 23E, 23F dan 23G.

"Perolehan agregat pemegangan lima peratus.

23A. (1) Tanpa menyentuh seksyen 23 dan seksyen 24 dan tertakluk kepada seksyen 23B, tiada seorang pun boleh melibatkan diri dalam sesuatu perkiraan atau perjanjian, secara formal atau tak formal, dengan nyata atau tersirat, untuk memperolehi apa-apa kepentingan dalam syer-syer bank berlesen yang diperbadankan di Persekutuan yang mana dia akan, jika perkiraan atau perjanjian itu dijalankan, mendapat kepentingan agregat dalam syer yang tidak kurang daripada lima

peratus daripada syer yang dikeluarkan oleh bank berlesen itu tanpa kelulusan terdahulu daripada Menteri akan penglibatannya dalam perkiraan atau perjanjian tersebut.

(2) Permohonan untuk kelulusan di bawah seksyen ini hendaklah dihantar kepada Bank Negara dan selepas itu Bank Negara hendaklah mengemukakan permohonan tersebut bersama dengan syornya kepada Menteri.

(3) Peruntukan-peruntukan seksyen ini hendaklah terpakai *mutatis mutandis* kepada apa-apa perkiraan atau perjanjian yang kemudiannya untuk memperoleh apa-apa kepentingan dalam syer-syer bank berlesen tersebut yang diperbadankan di Persekutuan sebagai tambahan kepada syer-syer yang kelulusan berkenaan dengannya telah diberi oleh Menteri di bawah seksyen ini.

Pemegangan maksimum yang dibenarkan.

23B. (1) Tiada seorang pun boleh memegang lebih daripada peratusan yang ditetapkan yang berikut dalam syer-syer yang dikeluarkan oleh sesuatu bank berlesen yang diperbadankan di Persekutuan:

(a) dalam hal seorang individu, sepuluh peratus; dan

(b) dalam hal seseorang, selain daripada seorang individu, dua puluh peratus.

(2) Bagi maksud seksyen ini dalam mengira pemegangan seseorang yang berikut hendaklah disifatkan pemegangan orang itu:

(a) di mana orang itu adalah seorang individu, pemegangan isteri atau suaminya, anaknya atau syarikat keluarganya (iaitu suatu syarikat di mana lebih daripada separuh syer-syer yang dikeluarkan oleh syarikat itu dikawal oleh individu itu, isterinya atau suaminya atau anaknya secara individu atau bersesama dengan salah seorang atau lebih daripada orang-orang yang disebutkan itu);

(b) di mana seseorang itu adalah suatu perbadanan, pemegangan oleh perbadanan yang berhubungan sebagaimana ditakrifkan dalam seksyen 6 Akta Syarikat 1965;

Akta 125.

(c) di mana seseorang itu adalah suatu pertubuhan yang didaftarkan di bawah mana-mana undang-undang bertulis yang berhubungan dengan koperasi, pemegangan oleh subsidiarinya sebagaimana ditakrifkan dalam seksyen 2 Akta Syarikat Koperasi 1948, dan perbadanan-perbadanan yang ada hubungan dengan mana-mana subsidiarinya itu dengan cara sebagaimana ditakrifkan dalam seksyen 6 Akta Syarikat 1965;

Akta 287.

(d) di mana seseorang itu adalah suatu perbadanan, pemegangan oleh mana-mana perbadanan dalam mana orang itu mempunyai kedudukan untuk mengawal tidak kurang daripada dua puluh peratus daripada kuasa mengundi dalam perbadanan itu.

Pemegangan yang dilarang dibuat oleh bank berlesen.

23C. (1) Sesuatu bank berlesen tidaklah boleh memegang—

(a) jika bank itu suatu bank perdagangan, apa-apa kepentingan dalam syer-syer suatu bank perdagangan lain yang diperbadankan di Persekutuan, sesuatu subsidiari bagi syarikat kewangan berlesen yang tak berhubungan atau sesuatu subsidiari bagi bank berlesen yang tak berhubungan;

(b) jika bank itu suatu bank dagang, apa-apa kepentingan dalam syer-syer suatu bank berlesen lain yang diperbadankan di Persekutuan, sesuatu subsidiari bagi syarikat kewangan berlesen yang tak berhubungan atau sesuatu subsidiari bagi bank berlesen yang tak berhubungan.

- (2) Bagi maksud seksyen ini—
- (a) “bank perdagangan” ertinya suatu bank berlesen selain daripada bank pedagang;
- (b) “bank dagang” ertinya suatu bank berlesen yang menjalankan perniagaan bank dagang;
- (c) “tak berhubungan” ertinya tidak berhubungan dalam erti seksyen 6 Akta Syarikat 1965.

Kepentingan dalam syer.

23D. Bagi maksud seksyen 23A, 23B dan 23C, seseorang yang memperolehi atau memegang, mengikut mana yang berkenaan, suatu kepentingan dalam sesuatu syer jika dia memperolehi atau memegang apa-apa kepentingan di sisi undang-undang atau ekuiti dalam syer itu dan apa-apa hak untuk menggunakan atau mengawal penggunaan sesuatu hak yang dilekapkan pada syer itu (tidak termasuk proksi untuk mengundi atas sesuatu syer) adalah disifatkan sebagai kepentingan dalam sesuatu syer.

Kuasa untuk mengecualikan.

23E. Menteri, atas syor Bank Negara dan tertakluk kepada apa-apa syarat sebagaimana yang disifatkannya patut dikenakan, boleh mengecualikan keseluruhan atau sebahagiannya, mana-mana orang daripada peruntukan-peruntukan Bahagian ini.

Kesalahan dan penalti.

23F. (1) Mana-mana orang yang melanggar mana-mana peruntukan seksyen 23A, 23B dan 23C (dalam seksyen ini disebut “pemegang ingkar”) adalah melakukan suatu kesalahan dan apabila disabitkan boleh dikenakan denda tidak lebih daripada lima puluh ribu ringgit.

(2) Apa-apa kepentingan dalam syer yang diperolehi atau dipegang oleh pemegang ingkar dengan melanggar mana-mana peruntukan seksyen 23A, 23B atau 23C hendaklah, apabila pemegang ingkar itu disabitkan di bawah seksyen ini atau apabila kesalahan itu dikompaunkan di bawah seksyen 53, dilupuskan mengikut peluang terawal

yang sesuai, tetapi tidak lewat dari enam bulan selepas sabitan atau kompaun itu, atau suatu tempoh yang lebih lama lagi sebagaimana yang dibenarkan oleh Menteri dalam mana-mana hal yang tertentu.

(3) Penggunaan mana-mana hak mengundi atau lain-lain hak, termasuklah, tetapi tidak terhad kepada penerimaan atau persetujuan apa-apa bayaran sebanyak apa-apa jumlah wang atau apa-apa hak terbitan yang dilekapkan pada mana-mana kepentingan dalam syer di bawah seksyen ini hendaklah terhenti daripada digunakan oleh seseorang pemegang ingkar apabila dia disabitkan atau kesalahan itu dikompaunkan.

(4) Jika seseorang pemegang ingkar tidak mematuhi atau bertindak dengan melanggar subseksyen (2) atau (3), Menteri, atau mana-mana orang yang diberikuasa bagi pihaknya boleh memohon kepada Mahkamah Tinggi untuk suatu perintah mengarahkan pemegang ingkar supaya mematuhi subseksyen tersebut.

Kecualian. 23G. Tiada apa-apa jua dalam seksyen 23A, 23B dan 23C boleh mentaksahkan apa-apa pemerolehan atau pemegangan apa-apa kepentingan dalam syer mana-mana perbadanan di bawahnya sebelum mula berkuatkuasanya seksyen-seksyen tersebut tadi yang sebaliknya akan menjadi sah di bawah mana-mana peruntukan lain dalam Bahagian ini.”

4. Akta ibu adalah dipinda dengan memasukkan selepas sahaja seksyen 27A, seksyen baru 27AA yang berikut:

Seksyen
baru 27AA.

**“Penga-
walan had
kredit.** 27AA. (1) Seseorang pengarah, pengurus atau pekerja sesuatu bank berlesen tidaklah boleh memberi apa-apa pendahuluan, pinjaman atau kemudahan kredit yang melebihi had kuasanya atau berlawanan dengan mana-mana arahan yang dikenakan oleh bank berlesen itu.

(2) Bagi maksud seksyen ini, Menteri dengan notis bertulis boleh mengarahkan sesuatu bank berlesen supaya mengemukakan

apa-apa maklumat yang berhubungan dengan polisi dan prosedurnya mengenai pemberian apa-apa pendahuluan, pinjaman atau kemudahan kredit, khususnya had-had kuasa seseorang pengarah, pengurus atau pekerja bank berlesen itu atau apa-apa perubahan mengenainya dari semasa ke semasa :

Dengan syarat bahawa Menteri hendaklah mempunyai kuasa bagi mengarahkan sesuatu bank berlesen supaya meminda prosedur yang diikuti oleh bank berlesen itu dalam memberi apa-apa pendahuluan, pinjaman atau kemudahan kredit, termasuklah had-had kuasa berkenaan dengan pemberian tersebut.

(3) Seseorang yang melanggar apa-apa peruntukan seksyen ini atau apa-apa arahan yang dikeluarkan di bawah seksyen ini adalah melakukan suatu kesalahan dan apabila disabitkan boleh dikenakan denda tidak lebih daripada dua puluh ribu ringgit atau penjara selama suatu tempoh tidak lebih dari tiga tahun atau denda dan penjara itu kedua-duanya.”.

Seksyen
baru 39A.

5. Akta ibu adalah dipinda dengan memasukkan selepas sahaja seksyen 39, seksyen baru 39A yang berikut :

“Pinjaman kepada bank berlesen dan pemerolehan syer-syer-nya. 39A. (1) Walau apa pun peruntukan-peruntukan perenggan (b), (c) dan (d) seksyen 31 Ordinan Bank Negara Malaysia 1958 tetapi tanpa menjejaskan seksyen 42 Ordinan Bank Negara Malaysia 1958, Bank Negara dengan persetujuan Menteri boleh—

(a) memberi pinjaman-pinjaman kepada sesuatu bank berlesen yang diperbadankan di Persekutuan dengan bercagarkan syer; atau

(b) membeli apa-apa syer sesuatu bank berlesen yang diperbadankan di Persekutuan bagi maksud mengawal perniagaan bank berlesen itu,

ib "jika Bank Negara berpendapat bahawa bank berlesen itu—

(i) berkemungkinan tidak berupaya menunaikan liabiliti-liabilitinya; atau

(ii) sedang hendak menggantung pembayaran.

(2) Bank Negara hendaklah melupuskan mana-mana syer yang dibeli olehnya menurut subseksyen (1) pada bila-bila masa Bank Negara berpuas hati bahawa sebab-sebab pembeliannya tidak wujud lagi.

(3) Pada menjalankan kuasa-kuasa yang diperuntukkan di bawah seksyen ini, Menteri atau Bank Negara, mengikut mana yang berkenaan, boleh mendapat nasihat daripada Panel Penasihat yang ditubuhkan di bawah subseksyen (2) seksyen 31A Ordinan Bank Negara Malaysia 1958.”

6. Teks Bahasa Kebangsaan bagi Akta ibu adalah dipinda—

Menge-
maskinikan
istilah-istilah
dalam teks
Bahasa
Kebangsaan.

(a) tertakluk kepada perenggan (b), dengan menggantikan perkataan-perkataan “tanggung”, “tanggung-tanggung” dan “tanggungnya” di mana jua terdapat dalamnya masing-masing dengan perkataan-perkataan “liabiliti”, “liabiliti-liabiliti” dan “liabilitinya”;

(b) dengan menggantikan perkataan “tanggung” dalam seksyen 51 dengan perkataan “obligasi”;

(c) dengan menggantikan perkataan-perkataan “Tanggung-rugi.” dalam nota birai kepada seksyen 46 dengan perkataan “Indemniti.”;

(d) dengan menggantikan perkataan-perkataan “perbadanan anak” di mana jua terdapat dalamnya dengan perkataan “subsidiari”;

(e) dengan menggantikan perkataan-perkataan “tataurusan persatuan” di mana jua terdapat dalamnya dengan perkataan-perkataan “perkara persatuan”;

- (f) dengan menggantikan perkataan “suratan” di mana jua terdapat dalamnya dengan perkataan “dokumen”;
- (g) tertakluk kepada perenggan (h), (i) dan (j), dengan menggantikan perkataan-perkataan “jumlah” (kecuali perkataan-perkataan “jumlah deposit”), “jumlah atau jumlah-jumlah” dan “Jumlah atau jumlah-jumlah” di mana jua terdapat dalamnya masing-masing dengan perkataan-perkataan “amaun”, “amaun atau amaun-amaun” dan “Amaun atau amaun-amaun”;
- (h) dengan menggantikan perkataan-perkataan “jumlah semua” dalam seksyen 15 (2) dengan perkataan “agregat”;
- (i) dengan menggantikan perkataan “jumlahnya” dalam seksyen 26 (c) dengan perkataan “agregatnya”;
- (j) dengan menggantikan perkataan-perkataan “jumlah agregat” dalam seksyen 27A (1) dengan perkataan-perkataan “amaun agregat”;
- (k) dengan menggantikan perkataan-perkataan “sipiutangnya” dan “sipiutang-piutangnya” di mana jua terdapatnya masing-masing dengan “pemiutangnya” dan “pemiutang-pemiutangnya”;
- (l) dengan menggantikan perkataan “menjumlahkan” dalam seksyen 21 (4) dengan perkataan “mengagregatkan”;
- (m) dengan menggantikan perkataan-perkataan “berkenaan dalam pengurusan” dalam seksyen 25 dengan perkataan-perkataan “bersangkut-paut dengan pengurusan”;
- (n) dengan menggantikan perkataan-perkataan “bil-bil perintah bayar” dalam seksyen 27A (1) dengan perkataan-perkataan “bil-bil pertukaran”;
- (o) dengan menggantikan perkataan “mengarahkan” dalam seksyen 13, 28 (2) dan (6) dengan perkataan “menyebabkan”;

- (p) dengan menggantikan perkataan “urusniaga” dalam seksyen 26A (5) dan 27A (1), “urusan” dalam seksyen 36 (2) (c) dan 49 dan “urusan-urusan” dalam seksyen 33, 34 dan 62 (2) masing-masing dengan “transaksi”;
- (q) dengan menggantikan perkataan “melihat” dalam seksyen 35 (1) dan 36 (2) masing-masing dengan perkataan-perkataan “akses kepada” dan “mempunyai akses kepada”;
- (r) dengan menggantikan perkataan-perkataan “penjawat awam” di mana jua terdapat dalamnya dengan perkataan-perkataan “pengkhidmat awam”;
- (s) dengan menggantikan perkataan-perkataan “perseorangan” dan “orang perseorangan” di mana jua terdapat dalamnya masing-masing dengan perkataan “individu”;
- (t) dengan menggantikan perkataan “perbahasaan” di mana jua terdapat dalamnya dengan perkataan “ungkapan”;
- (u) dengan menggantikan perkataan-perkataan “akhir dan muktamad” dalam seksyen 40 (c) dengan perkataan-perkataan “muktamad dan konklusif”;
- (v) dengan menggantikan perkataan “pembicaraan” di mana jua terdapat dalamnya dengan perkataan “prosiding”;
- (w) dengan menggantikan perkataan “nyataan” dalam seksyen 23 (2) (a), 41 (3) dan 44 (4) dengan perkataan “hal”;
- (x) dengan menggantikan perkataan “membenarkan” di baris 4 dalam seksyen 51 dengan perkataan “mengizinkan”;
- (y) dengan menggantikan perkataan “kongsi” dalam seksyen 26A (1) (b) dan 56 (2) (b) dengan perkataan “pekongsi”;

(z) dengan menggantikan perkataan-perkataan “pertelingkahan atau pertentangan” dalam seksyen 58 dengan perkataan-perkataan “percanggahan atau ketakkonsistenan”;

(aa) dengan menggantikan perkataan-perkataan “membina semula” dalam seksyen 24 (1) (b) (i) dengan perkataan-perkataan “menyusun semula”; dan

(ab) dengan menggantikan perkataan-perkataan “seksyen kecil” atau “seksyen-kecil” dan “perenggan kecil” di mana jua terdapat dalam-nya masing-masing dengan perkataan-perkataan “subseksyen” dan “subperenggan”.

HURAIAN

Rang Undang-Undang ini bertujuan untuk meminda Akta Bank 1973 bagi maksud-maksud yang dinyatakan di bawah ini.

2. *Fasal 2* bertujuan untuk mengemukakan tafsiran bagi “syarikat kewangan berlesen”.

3. *Fasal 3* bertujuan untuk mengemukakan seksyen baru 23A, 23B, 23C, 23D, 23E, 23F dan 23G kepada Akta—

(a) bagi melarang seseorang daripada melibatkan diri dalam apa-apa perkiraan atau perjanjian untuk memperolehi pemegangan syer yang mana apabila diagregatkan dengan pemegangan syer yang sedia ada akan berjumlah tidak kurang daripada lima peratus daripada syer yang dikeluarkan oleh sesuatu bank berlesen yang diperbadankan di Persekutuan, tanpa mendapat kelulusan terdahulu daripada Menteri, atas syor Bank Negara;

(b) bagi memperuntukkan bahawa had-had pemegangan syer akan disekat kepada pemegangan maksimum yang dibenarkan sebanyak sepuluh peratus dalam hal orang individu, dan dua puluh peratus dalam hal perbadanan, koperasi atau lain-lain;

(c) bagi melarang pemegangan silang oleh bank perdagangan atau bank dagang dalam lain-lain bank perdagangan dan dalam subsidiari-subsidiari lain-lain bank berlesen dan syarikat kewangan yang bukan dalam kumpulan mereka. Bank-bank dagang juga dilarang daripada memegang syer-syer dalam bank dagang yang lain;

- (d) bagi memperuntukkan bahawa apa-apa perolehan atau pemegangan apa-apa kepentingan dalam syer mana-mana bank berlesen yang diperbadankan di Persekutuan sebelum mula berkuatkuasanya pindaan-pindaan itu, tidak akan menjadi taksah.

4. *Fasal 4* bertujuan untuk mengemukakan seksyen baru 27AA kepada Akta bagi melarang seseorang pengarah, pengurus atau pekerja sesuatu bank berlesen daripada memberi apa-apa pendahuluan, pinjaman atau kemudahan kredit yang melebihi had kuasanya atau berlawanan dengan apa-apa arahan yang dikenakan oleh bank berlesen itu.

5. *Fasal 5* bertujuan untuk mengemukakan seksyen baru 39A kepada Akta, untuk membenarkan Bank Negara, dengan persetujuan Menteri Kewangan, memberi pinjaman kepada sesuatu bank berlesen yang diperbadankan di Persekutuan terhadap cagaran syer itu atau untuk membeli apa-apa syer sesuatu bank berlesen yang diperbadankan di Persekutuan untuk mengawal perniagaan bank itu, jika Bank Negara menganggap bahawa bank berlesen itu berkemungkinan tidak berupaya menjelaskan tanggungan-tanggungan atau hampir hendak menggantung pembayaran. Menteri atau Bank Negara, dalam mengambil apa-apa tindakan di bawah seksyen ini, boleh mendapat nasihat daripada Panel Penasihat yang ditubuhkan di bawah subseksyen (2) seksyen 31A Ordinan Bank Negara Malaysia 1958.

6. *Fasal 6* bertujuan mengemaskinikan istilah-istilah yang digunakan dalam teks Bahasa Kebangsaan oleh kerana sejak terkanunnya undang-undang itu, istilah-istilah yang berkenaan yang merujuk kepada perkara-perkara yang sama seperti yang terkandung dalam fasal ini telah berubah. Pindaan-pindaan ini, tidak menjejaskan isi kandungan undang-undang itu.

IMPLIKASI KEWANGAN

Rang Undang-Undang ini tidak akan melibatkan Kerajaan dalam apa-apa perbelanjaan kewangan tambahan. [PN. (U²) 1299.]